

LIBROS



O CARVALHO

J.F. Clémence e
F. Péron
Ed. Temas e Debates,
104 pax. Portugués

Xa en 1950, Schuster observou que o gaio escollía as landras máis sas e resistentes para logo enterralas nun terreo solto. Ate catro mil cincocentas podía chegar a agachar esquecéndose da metade delas que acabarán por enraizar. Isto converte ao gaio nun verdadeiro plantabosques, podendo logo atribuírle parte da responsabilidade do avance da colonización do carballo en Europa, uns cincocentos metros por ano apuntan os autores. Esta é só unha mostra das moitas cuestións que trata este libro sobre esta árbore tan galega. Porén, o libro non se queda só nos aspectos biolóxicos describindonos os carballos europeos, a vinculación da árbore coa paisaxe, as súas doenzas, etc. Este fermoso libro, achégase aos seus usos (madeira, mariñeiría, como leña ou para pipos) dende a perspectiva forestal. Tamén hai espazo para unha receita de café de ladras ou para as lendas que rodean esta árbore. O libro conclúe cos carballos portugueses máis espectaculars así como unha suxestión para a súa lectura.

A tradución deste libro francés, revisado polo enxeñeiro agrónomo José Alves e polo enxeñeiro forestal Manuel Miranda, é o terceiro libro desta coleccionada e recomendábel colección dedicada ás árbores.

'RECURSOS' CERNA PIDE A TÚA COLABORACIÓN

Se estás interesad@ en que divulguemos en Cerna algún libro, CD, revista, etc, ponte en contacto con nós (ramses@adega.info), indicando 'Recursos' Cerna.



XAÍME E AS LANDRAS

Tim Bowley e
Inés Vilpi
Kalandraka
Galego

E falando de plantadores de landras presentámosvos a teimosía que Xaime tivo ao longo da súa vida para que as landras que el collía debaixo dos carballos chegaran algún día a ser arbores baixo a que poder tombarse e de novo recoller landras coas que... Outro fermoso libro que con moitas menos palabras, coidado deseño e exquisitos debuxos, recomendamos para cativas e maiores.

REVISTAS



ABALAR. A XEOGRAFIA GALEGA EN CONSTRUCCIÓN

Ed. Proxecto Abalar
Galego

Número 5, especial medio ambiente, que nos presenta diferentes visións de diversas temáticas, ou poderíamos dicir problemáticas ambientais, que reflexionan sobre "o desleixo territorial que afecta quer ás cidades quer á natureza". Pasado, presente e futuro dos Espazos Naturais Protexidos en Galiza, o Plan INFOGA, a perda da biodiversidade, as zonas verdes urbanas, os residuos urbanos en Galiza e o turismo, vivenda, campos de golf e outras fábulas da economía española compoñen esta sección. Artigos escritos respectivamente por Manuel Cabalar, Anxo Miramontes, Elena Ojea, Román Sanz, Dolores Juanatey e José Somoza. Completan este caderno outras seccións como notas, banda deseñada ou a presentación de outras publicacións como "ollando revistas" e "lendo libros". Parabéns polo proxecto.


+Abalar (abalargaliza.blogspot.com)

VIDEO

OS MARES DOCES DE GALICIA

Dirección, guiión e fotografía: Manuel E. Garci
Galego, 32 minutos

Documental de natureza que percorre os cursos fluviais, mostrándonos a súa rica diversidade. A vida da lamprea, peixe doutros tempos, xunto co salmón atlántico son o fio condutor que nos amosa a vida que podemos atopar nos diferentes treitos dos ríos galegos. Vídeo de produción propia, cunha magnífica fotografía que deu lugar a unha exposición que estes días esta percorrendo Galiza. Este documental foi cedido amablemente polo autor para proxectar no Campamento de Voluntariado Ambiental do río Tea. Dende ADEGA queremos amosar o noso agradecemento.



AS ENCROBAS A CEO ABERTO

Un documental de
Xosé Bocixa
Videofilm IB Cinema,
2007

"O poder político, o social, o económico... as emocións, as afectividades, as añoranzas e o baleiro das persoas que sofren o mal irreversible de perder o seu pasado son as protagonistas deste documental; xunto cunha industria que trouxo moita riqueza pero levou canto había". Este DVD trata fundamentalmente os impactos socioculturais da implantación dunhas industrias (a mina de Limeisa, a central termoeléctrica de FENOSA en Meirama...) que se apropiaron dos recursos naturais e do recurso por excelencia, a terra, e mesmo das vivendas. Centrado no intre histórico das primeiras loitas "ecoloxistas" en defensa da terra en Galiza (Baldaio, Xove, As Encrobas, na segunda metade da década dos setenta) proxéctase tamén na problemática ambiental de hoxe en día, arredor dos impactos ambientais e sanitarios de FENOSA e SOGAMA nesta comarca.